

建陽縣志卷之十一

列傳 人物類

王佛生字子善資性純美攻進士業兩舉不第隱居溪源莊以詩鳴世嘗作東陽懷古詩有東陽酒味香千古雲谷書聲歇幾年之句

孫慶

慶字仕俊天性純篤留志讀書尤工於詩文隱德弗耀與建安楊少傳為金石交嘗寄少傳詩有扶日股肱賢輔力擎天柱石老臣心之句少傳復以詩云苗

裔承先孫又子槐陰遺後古猶今自是每欲薦之仕俊復以牛詩一首曰寥寥殘喘思悠悠堪嘆西山一老牛賢相問時當要道逸民飲處擇清流山川勿用方辭角田野那堪似畫頭秋艸離離秋水冷恩深牧養力難酬少傳因此知其不欲仕乃已壽七十有八卒于家

叙曰子善質美業攻而不獲售亦沮於時而已卒以詩鳴世仕俊性純志篤尤工於詩文有乃祖風

且每讓少傳之辟情見乎辭其亦躡箕山首陽之踪者乎

張昇字伯起崇化里人生甫四歲穎悟過人即知讀書八歲五經子史皆能成誦通曉義理九歲善於題詠邑以薦于浙省既至丞相吟孫見其資質秀整善應對遂以神童聞于朝神宗一見喜曰江南有此神異人邪俾入胄監肄業及冠授秘書校書郎累官至江西儒學正提舉至正戊戌陳友諒據豫章追取公

印公曰余自幼蒙恩今踰七十矣焉能違義苟生以辱名教乎遂以印投井不食而卒

子智

智字玄畧洪武初由明經舉任湖廣夷陵州學正陞禮部右侍郎凡禮樂制度多所建明授嘉議大夫未幾以事左遷國子學錄永樂乙酉陞司業卒于官

叙曰伯起以神童入胄屈身仕元似昧於出處之正及陳友諒叛遂投印死節可謂美終晚蓋者矣玄畧以明經辟在國初多所建明其亦克蓋前

人之愆乎

蔣易字師文從杜本游徧交知名士博極群書編磨句定手自刪錄學極精到肆筆為文直追古作左丞阮德柔分省于建禮到幕府待以上賓所著有鶴田集并編類元朝風雅行世

叙曰易碩學宏才徒為阮左丞所重而不究登用豈時居樞要者尚蹈竊位之失歟吁可慨已

熊袞崇泰里人事親至孝忽三日驟雨本家園地銅錢皆滿惟熊氏所得者堪用其隣里僕隸所得悉化為土因號袞為雨錢翁累世子孫文科武舉恩榜奏蔭者凡一十二人所居之地號曰熊墩

叙曰袞以孝行上格皇穹感應之機亦神已雨錢翁之號為世傳頌其克昌厥後也固宜

胡本字貫通性最孝尤精地理學父喪廬墓三年惟啜粥茹蔬鄉閭稱之卒郡守芮麟題其墓曰孝子鞠莊先生

叙曰貫通廬父墓三稔至來芮守表其墓秉彝好德在人之公也如是夫

劉剡字祖章自號仁齋崇化人世居書坊博學不仕凡書坊刊行書籍多剡校正嘗編輯宋元資治通鑑節要等書行于世卒年七十

叙曰剡涉獵墳典淹貫禱乘遂著宋元鑑雖其潛德弗耀其令名將終不朽矣

丁顯字彥偉幼以俊秀選補邑庠生資稟聰敏知所向學博通經史洪武癸亥歲貢升太學生甲子領應天府鄉薦乙丑會試中式對策

御覽擢為第一國初狀元自顯始屏山劉童贊曰俊偉之資博通經史甲子開科首登龍虎聖主推才期于佐輔天不假年惜顛雲路

叙曰彥偉以琦瑰器大魁天下為潭城增耀斯亦罕矣而乃天不假年弗獲大樹勛業惜哉

劉童字良能不妄言笑好學精于易永樂間舉進士

除湖廣寧遠知縣有政聲觀風者以超出群類舉因不協于權勢遂寢其事陞江西布政司經歷秋官侍郎何文淵薦雲南蒙化知州致仕

叙曰良能宰邑卓有政聲為當道器重固宜不次超遷可也而乃見抑於要路孰謂公道果明于世哉

黃璿字景衡博學多文由監生任直隸霸州判官嘗纂修建陽縣志行于世

叙曰景衡文學充溢雖未登科第而修集志書亦足垂名于不朽云

丁慈字元凱登景泰甲戌進士任雲南道監察御史陞河南按察司僉事蒞政嚴明獎善鋤奸有聲臺憲卒于官

叙曰元凱兩任咸著政聲昔人有澄清天下之志者殆近之矣

虞良字廷弼天順間由國子生授江西南昌府通判

督糧理訟有聲子時卒于官

叙曰廷弼為洪都司戶聲稱籍籍而竟卒于任詩曰或王事鞅掌其廷弼之謂乎

吳浩字元養天順間由國子生授廣東肇慶府經歷委築四會新興二縣城有化盜安民善政隨總戎顏彪征廣西累受旌賞致仕

叙曰浩為府幕城邑有功肇人至今賴之其與昔人城齊城韓者茂烈並著矣

袁鎬字世京弘治間由國子生任廣東瓊州府推官適瓊缺守貳鎬署政公嚴振紀綱除宿弊罪奸吏以遠戍者數人供本職折獄詳明罪人讐服屢受當道旌異卒于官

叙曰世京署瓊篆用清吏弊律法森嚴為當道褒嘉而乃不永天年弗獲久任悲夫

袁銛字時敏由鄉舉授廣東電白知縣政尚寬簡有清素風民咸德之

叙曰時敏令電專務簡素昔人有治蒲治密思以德化者殆庶幾乎

虞金字宣之領壬子鄉薦任衡山知縣蒞政勤謹民樂其業所屬有魚課額外羨餘痛革宿弊以剛方不徇于時遂急流勇退焉

叙曰昔人蒞政橫起額外之征雖置民于溝壑而恬不顧者其視宣之宰衡相去奚啻什百哉

王相字舜舉元至正末為雙峯書院山長值紅巾亂弗克歸 國朝初舉秀才為掾為簿遂著籍順昌後棄官歸鄉再膺其邑薦辟為知事擢御史有謇諤風

卒於官好吟咏所著有紀行省風等書

見順昌志

叙曰舜舉為御史有直聲且多所著作則薦辟亦不可謂不得人矣

程蕃字伯昌博學多識舉明經官至直隸徽州府儒學教授歷典文衡致仕卒

叙曰伯昌多學竟以明經辟歷司文衡雖未獲大

售亦非抱藝卒老於行者矣

熊熙字文明號觀齋天性恬默篤志嗜書從林玘先生學易與蔡虛齋同稱高弟父喪哀泣左頰深墨撫弟爚寡妻成其貞節視猶子如己出與人無競未嘗凌人以勢領鄉薦以忤同郡權貴擢乙榜授翁源邑訓禮諭負固子江瓊率教以安鄉邑欲謝病歸門人皆感泣願留既歸崇建之士多從之所著有四書周易管天

叙曰文明受林氏易學而平生歷履皆犁然有當於人心是誠無忝于科目中人矣

黃麒字夢徵少刻苦讀書善文詞尤邃于易誠恪不欺有古人風弘治甲子鄉薦亞魁歷任贛掄虞城教諭轉潮陽教授補任辰州善造就人才陞九江節推益自砥礪致政家居田廬仍舊所著有時齋集

叙曰夢徵窮而成已達而成物至歸休且家徒四壁古有所謂苦節清修之士非其儔邪

附錄

武功

詩稱赴赴武夫公侯干城是以戡定禍亂捍衛民人鎮撫邦家咸於武弁焉攸賴然紈袴子弟手不知兵反爲借寇之資耳若其禦侮折衝制勝料敵戰伐有功賞延于世固一邑之雄也斯人亦不多得循名覈實庸可遺而弗錄乎故附于傳末以爲用武立功者勸

國朝

翁陸字子壽同由里人以趙府妃親任常山中護衛鎮撫終于官子二人長曰星字彥明授指揮僉事次曰好字彥純授正千戶

陳善安字存誠興中里人正統十三年沙縣賊鄧□七叛逆倡亂賊將過境起集本里人衆奮力殺賊有功授所鎮撫

王雅字文質興上里人與陳善安同時亦起本鄉人

衆會合殺賊有功亦授所鎮撫

張鏜字文振洛田里人自幼從軍湖廣五開衛景泰元年苗賊為患地方鏜從調赴敵敢前殺賊有功事聞授本衛所鎮撫歛村勾洞苗蠻作亂從總戎兵部王尚書征勦得捷上其功陞本衛副千戶病疾辭子貴襲其官

張貴鏜之子成化間以父蔭任湖廣五開衛副千戶弘治六年都勻蠻叛猖蹶領軍征勦斬獲賊首四級

總戎顧鎮遠侯給賞銀牌四面奏陞正千戶弘治十四年佐總戎永康侯殺賊於圍口十八寨斬獲甚多事聞陞本衛署指揮僉事

叙曰子壽以藩邸親得膺職秩固不足多若存誠文質與文振父子四人咸有軍功世獲襲蔭榮及後昆其亦功懋懋賞者哉